

Contenta libri

- I. De las 5. & 6. Constit. Theol. Bideembachij
- II. Der 19. psalm von D. Joh. Bugenhagen abgelezt.
Von dem das die hundertstücke
von den Engländern hinnen zu denen die man
nicht kufft kan
Von D. L. Töpfer für die Weiber Vochel od Angewandgang
- III. Sendschriefft. Beza an Gurf. zu Sauffe
- IV. Redemben etlicher Theologe von dem N. ritten,
berufft Catechison
- V. Disputatio Myrica cum Jesuitis gefalt zu
Fulda. fo. 1573.
Von von Brigand de Lucinigel. Der Letzt D. Falikon

Sammelband

Cc 204, II

Sendbrieff

JHEODOX BEZAE

An Churfürstliche Durchleuchtigkeit zu Sach-
sen/die Spaltung von der Maiestet vnd
dem Abendmal onfers Herren
Jesu Christi belan-
gende:

Dem Teutschen/Christlichen/friedlieben
Den leser zu gut/vnd zur ableinung vnd linderung
der vnbillichen schmähungen vnd verbitterungen/so sich
bisher ober diesen Artickeln Christlicher les-
re haben zugetragen/aus dem La-
tein verteutschet.

Galat. 5.

So jr euch vndereinander beisset vnd fresset/so sehet zu/
daz jr nicht vndereinander verzeret werdet.

Gedruckt in der Churfürstlichen Statt
Heidelberg durch Johannem Meier.



Handwritten text, likely a title or heading, appearing as a mirror image bleed-through from the reverse side of the page.

Handwritten text, likely a title or heading, appearing as a mirror image bleed-through from the reverse side of the page.

Handwritten text, likely a title or heading, appearing as a mirror image bleed-through from the reverse side of the page.

Handwritten text, likely a title or heading, appearing as a mirror image bleed-through from the reverse side of the page.

Handwritten text, likely a title or heading, appearing as a mirror image bleed-through from the reverse side of the page.

[Bèze, Théodore de]

Handwritten text, likely a title or heading, appearing as a mirror image bleed-through from the reverse side of the page.

Handwritten text, likely a title or heading, appearing as a mirror image bleed-through from the reverse side of the page.



Dem Durchleuchtig-
 sten Hochgeborenen Fürsten vnd Herren/
 Herren Augusto/Herzogen in Sachsen/des Heil-
 igen Römischen Reichs Churfürsten vnd Erzmarschal/Land-
 grafen in Thüringen/ Marggrafen in Meissen/ Burgo-
 grafen zu Magdeburg/ ic. seinem Gnä-
 digsten Herren.



Durchleuchtigster Hochge-
 borner Churfürst / Gnädigster
 Herr / Nachdē bißher nun in die vierzig jar
 so viel hefftige/einheimische vñ außlendische
 krieg/bey allen Nationen der welt/zum theil
 vñ sich zergangē/zum theil durch gewisse ver-
 träge sind hingelegt /so befrēdet vñ beschweret es heutiges tags
 viel leut nit wenig/das allein d̄ streit in Religions sache/vnder
 denē/die sich für Friedsbottschafftē außgebē/ nit allein kein end
 gewinnen mag / sonder auch je lēger je hefftiger wird/vnd/da er
 gleich bißweillē scheint erloschē sein/doch als bald widerum̄ gleich
 als ein inwendig brennender berg/fewr außwirfft/ vñ die Christ-
 lichen gemeinen weit vnd breit verwüstet. Die aber den vrsprüg
 dieses jämmerlichen vbels begeren zuerforschen / sind nicht einer-
 ley meinung/darauß dann noch ein grösser vnfall erfolget / das
 nemlich/dieweil vnerkandter vrsach der franckheit / entweder
 gar keine / oder gefährliche/oder auch böfere arzneyen dann der
 schaden selbst/gebrauchet werden/gemelter schad algemach är-
 ger vñd gang vnheilbar wirdt. Dann etliche verwunderen sich
 A ij niche

nicht allein gar nicht vber diesem immerwerenden einheimische
 krieg/sonder verachten auch denselben so ganz vnd gar / daß sie
 auch schier denselbē/ gleich wie die ärzte das Fieber an den lamen/
 ihnen lassen gefallen/vnd darzu vermeinen zuhelffen. Dann als
 so/sagen sie/habs mit der Kirchen eingestalt / daß sie mit ihren
 feinden/so sie von innen vnd von aussen anfechten/einen vnuer-
 träglichen krieg füre/ vnnnd gereiche der Kirchen zu irem besten/
 daß nit allein spaltungē/sonder auch ketzereien entstehē/auff daß
 die/so rechtschaffen sind/offenbar werdē. Etliche aber lassen inē
 wol solches nit gefallen / vnderstehen sich aber die ganze schuld/
 irem duncken nach/ehe auff die aller vnschuldigste/dann auff die
 ursächer solches vnrahts zutrechē. Vnder des liget die schwache
 francke Kirch darnider/ vnnnd geräth dahin/daß sie niemand so
 sehr beschädiget/als eben dieselben/die für ire ärzte wöllen ange-
 sehen sein. Darumb sind etliche gewesen/vñ sind derselben noch/
 die da meinen/gleich wie man inn franckheiten pflegt/die nit zu
 heilen sind/daß alles der zeit/oder viel mehr der fürsichung Gots
 tes heimzustellen sey/vnnnd keine verbesserung zuversuchen/dies
 weil nicht allein die vngleiche lere/sonder auch derselben einfü-
 rer vnd handhaber so vnuersönlich mit einander streitten. Was
 sol aber nun ich zu diesem sagen/der ich nicht raths gefragt wer-
 de/vnd da ich gefragt würde/keinen rath nicht hette/vnnnd da ich
 in gleich hette/nit des ansehens bin/daß man mir glauben gebe.
 Ja wer wil mich hören vber einen anderen klage / weil mir selbst
 verantwortung scheinēt not sein? Jedoch/ Gnädigster Churf.
 vnnnd Herr / wil für E. Churf. G. aus tröstlicher zuuersicht zu
 derselben sonderlichen billigkeit vnd güte/ ich etwas hierzu sage/
 dessen mit danck sagung gegen Gott dem Allmechtigen höchlich
 mich frewende/daß mein widersächer selbst/ E. Churf. G. für al-
 len andern/diesen handel zuerkennen/erwelet hat. So aber viel
 leicht

Theodori Bezae.

leicht er hierinnē etwas zukūn vñ vngēbürllich gehädelt/so bleibe
one zweiffel alle diese schuld allein auff im/ Ich aber muß für E.
Churf. G. als ein verflagter erscheinen. Wil derhalben erstlich
etwas vom inhalt der ganzen sachen/darnach auch von meiner
person ein wenig sagen.

Das die Christliche Kirch einen steten krieg mit inwendig
gen feindē führen muß/bis an das ende der welt/da der himlische
Vater alles seinem Son vnderwerffen wird/ist kund vnd offen
bar/zugleich aus Gottes wort/vnd auß der teglichen erfahrung.
Das aber wir in dieser feinde anzahl gehören/dasselbig müste ja
zuuor bewiesen sein/ ehe die entschuldiget würden/so vns ein so
lange zeit/vñ so vnbedechtig verfolgen/das sie auch die abgesag
ten feinde faren lassen/irer eigenē schaffe augenscheinliche kräc
keiten verachten/vñ vns allein anlauffen. Was ist aber dann
die vrsach? Geschichts darumb/das wir von dem einigen wesen
Gottes/von den dreyen personen der Gottheit/von der person
oder vom ampt Christi/vom Gesez oder Euangelion/von der
Sündē/von der Gnade Gottes/vom glauben/von der gerechte
machung/von den guten wercken/von der Auferstehung der
Totten/vom zukünfftigen gericht/vom ewigen leben/oder aber
das wir von der Sacrament art vnd eigenschafft/von der alge
meinen vnd alzeit werenden Sacramente zal/von den Sacra
mentlichen warzeichen/von ihrer bedeutung/von den vrsachen
der einsetzung/vñ rechten brauch der Sacrament/vneins seindē
Solches wird/meines achtens/niemand vnder jnen sagen/ auß
genommen die jenigen/welcher meinung wir so wol/ als E.
Churf. G. Vniuersitet zu Witeberg/mit herzen vnd mund ver
neinen/welche nemlich/die zwo naturen in Christo mit dem ke
ßer Nestorio,vñ derselben wesentliche eigenschafftē mit Eutychete
vermischen. Dann ob wol etliche der jenigen/so sich lassen anse
hen/als

hen/als sie sich diß allein beflissen / daß sie einen zant auß dem andern anfangen (gleich als hetten wir zuuor nit zant's genug des Herren werck zuuerhindern) vns in etlichen andern puncten zutadlen sich vnderstehen / So sind doch fürhanden vnserer Kirchen/nemlich in Schweiz vnd in Franckreich / Bekantnisse / jener zwar weitleufftig / dieser aber kürzlich / die hauptstücke vnser / das ist / des Euangelischen glaubens begreiffende / welche allein mehr dann genug sind / vns solcher falschen aufflag zuentladen. Was ist dann nun die ursach eines so grossen vnd vnuerfönllichen hasses? Diese / spricht der so mich wider meinen willen in diesen streit gezogen / daß wir dē menschē Christo dieselbe macht benemen / die jm gegeben ist / vnd er empfangē hat vber alle Creaturen / das ist / die Göttliche gewalt. Darnach / daß wir auch Christo benemen die warheit seiner Verheissung vnd seines Testaments / als wann er mit seinem leib vnd blut im Nachtmal allenthalben / wo dasselb rechter weis gehalten wird / nicht gegenwertig sey / ja auch / so er gleich wolte / nicht gegenwertig sein könne / auch nicht könne mit dem gebenedeiten brodt vnd wein / den gegenwertigen / warhafftigen seinen waren vnd wesentlichen leib vnd blut aufteilen. Diß sind seine wort / welche so sie war weren / dermassen sie von jm geschrieben sind / so bekente ich frey vnd offentlich / daß wir nicht allein aller menschen haf / sonder auch die höchste straffe verdienet hetten / vnd wolt mich selbst gebürliche straff für solche grosse vbelthat zuleiden / zum aller ersten erbieten. Ist derhalben an E. Churf. G. mein vnderthänigste bit / sie wöllen von diesen stücken / meinen nicht weitleufftigen vnd außfürliche / sonder allein kurzen vnd summarischen bericht / gnädigst vernemen. Ich bit man wöll doch bedencken / ob dann die jenigen den menschen Christum der Almechtigkeit Gottes / welche vnendlich vnd einig ist / berauben / die eben denselben menschē
Christum /

Christum/für den waren/einigen vnd ewigen Son des ewigen
 Vatters erkennē/vnd solches wider jetziger zeit kesser immerdar
 (ohne rhum zureden)so standthafftig als jemand/haben vertädi
 get. Vnd so vnser widerfächer/durch des menschen Christi göt
 liche macht/verstehen eine erschaffene krafft/so die Schultheolo
 gen nicht vnbequem nennen potentiam habitualem, oder wie die
 Brensischen daruon schreiben/ein außgegossene gabe/die nicht
 ein eignes vnd selbstendiges/sonder an dem fleisch Christi han
 gendes wesen habe/so wolt ich gern hören/welche eine volkōmli
 chere vnd grössere krafft dem fleisch Christi zuschreiben/jene/so
 die menscheit Christi wollen vberal wesentlich gegenwertig ha
 ben/da dieselbe menscheit zugebieten hat/dieweil ihrer meinung
 vnd Bekantniß nach/die obgemeldte krafft des fleisches/sich nit
 weiter dann das fleisch erstreckt/vnd also nirgend außserhalb
 des waren menschlichen leibs ist/Oder wir/die wir aus vermög
 heiliger Schrifft/vnd der vnableglichen eigenschafften eines
 waren/natürlichen/auch zum höchsten verklärten leibs/lehren
 vnd bekennen/das der mensch Christus/so viel seine menschliche
 natur belanget/daroben im Himmel sey/vnd sich jetzund nir
 gend dann daselbst auß ganz freyem willen halte/also/das dem
 noch nicht desto minder eben derselbe mensch/so fern eben diese ei
 nige person auch warer Gott ist (das ist/nicht ein andere/son
 der eben dieselbe person/so warer mensch ist/doch nicht nach irer
 menschlichen/sonder nach irer göttlichen natur) allenthalben/
 ich wil geschweigen in seinem Abendmal/vnd in seiner Kirche/
 gegenwertig sey/vnd auch als ein mensch/alles vñ jedes im him
 mel/aufferden/vñ vnder der erden/nach dē er durch auß volkom
 mene gwalt empfangē hat/verwaltes Jene lere vō wesentlicher
 außgiessung göttlicher eigenschafftē in die mēschliche natur/hat
 vorzeitē der kesser Euyches erdichttet/vñ Brenz mit dē seinē er
 newret/

Sendbrief

Snewret/diese aber (vß gegewert des mensche an alle ortē nach sei-
ner gottheit) ist die lere darzu wir vns bekennen. Welcher theil
nun bey der warheit stehe/wollen wir die Universitet zu Wite-
berg lassen vrteilen. Alhie aber faren dieselben zu/welchen ich ses-
kund fürgenommen zuantworten/ vnd verwerffen wol/wie bil-
lich/die allenthalbenheit des leibs/als ein vnchristliche vnd kete-
rische lere: Schreien aber vber vns / daß wir das fleisch Christi
der göttlichen krafft berauben/wann wir nicht bekennen/daß die
menschheit Christi/ob sie wol im himmel in ihrer groß vnd masse
begreiflich ist/dennoch wesentlich an allen orten/da sie wol/vnd
beuor auß im H. Abendmal sich vns darstelle/als die zur rechten
des Vatters siket/das ist/allen gewalt im himmel vnd auff erdē
empfangen hat. Darauff (daß wir jesund die frag vom Abend-
mal ein wenig auffschieben) geben wir diese antwort. So von
dieser gegenwertigkeit zuhalten vnd zuvrteilen ist / auß der per-
sönlichen vereinigung der naturen (wie es dann auch ist) oder/
wie die Schultheologen reden/aus der gnad der vereinigung:so
ist die wesentliche gegenwertigkeit des fleisches an vielen orten
zugleich/nichts dan ein lauter gedicht/darum/daß auß vermög
der persönlichen vereinigung/dieser mensch Christus nicht an-
ders an vielen orten zugleich gegenwertig/dan wie er auch Gott
ist. Nun aber ist dieser mensch Gott / nicht durch verwandlung
seiner menschheit in ein göttliche/oder der göttlichen in die mēsch-
liche natur/sonder durch vereinigung beider naturen / vnd nach
seiner gottheit/mit welcher er vereiniget ist. Wil diß deutlicher
sagen. Der mensch Christus ist von wegen der gaben der vereini-
gung nicht auff ein andere weise an vielen orten zugleich / dann
auff welche weiß er auch Gott ist. Nun ist er aber nit Gott in im
selbst/das ist/nach seiner menschheit (welche rede D. Selnecker
vnrecht vermischet mit diesen/durch sich selbst/vnnd/besonders)
sonder

Vom
ivviamphim

Arzthm.
ad d. 16. 15
1619

Sonder so fern er mit derselben natur / welche allein mit keinẽ ort
 umbschrieben wird / vereiniget / aber nicht vermischet ist. Folget /
 daß er auch nicht zugleich an vielen orten sey / in oder nach seiner
 menschheit / sonder in oder nach derselben unbegreiflichen / das
 ist / der göttlichen natur. Über das / so sie / wie gesagt / hiemit
 nichts anders dann die persönliche vereinigung wollen verstan-
 den haben / so thun sie gewißlich sehr vnrecht daran daß sie nicht
 frey öffentlich die gegenwertigkeit des menschen an allen orten
 bekennen. Dann Christi angenommes fleisch / so fern es mit der
 annemenden natur eine person ist / ist eben so wol allenthalben /
als die annemende Gottheit / doch das fleisch nach der andern na-
tur / wie oft gemeldet / die gottheit aber nach oder in jr selbst. So
 sie aber ein erschaffene gabe in der menschheit meinen / so schreiben
 vnd reden sie / meines achtens / noch viel vngeschickter ding / dann
 eben die Brenzischen / vnd sind jnen selbst zuwider. Dann so diß
 war ist / dessen sie vns beschuldigen / daß nemlich der den mensche
 Christum seiner göttlichen krafft beraube / der demselben etwas
 vnmöglich sein vermeint / wie können dann die solcher schuld ent-
 laden sein / so da fürgeben / daß er nicht allenthalben könne gegen-
 wertig sein / sonder allein da er wil? Dann freilich ist es ein grö-
 ßer ding / zugleich allenthalben sein / dan da allein wo einer zusein
 begeret. Ferner / so das fleisch Christi nit allenthalben ist / vnd
 dennoch seine krafft sich an alle ort erstreckt (welches on allẽ zwei-
 fel war ist / dieweil sich alle knie für ihm müssen biegen) wie wöl-
 len sie dann ihre wider vns gefürte klag erhalten / nemlich / daß
 wir darumb die krafft des fleisches Christi verleugnen / weil wir
 lehren / daß dasselbe jekund nirgend dan im himmel sey / noch biß
 an jüngsten tag sein werde? Ich sage also / So der mensch Chri-
 stus an denen orten nicht der Herr bleibt / an welchen er nicht we-
 sentlich in oder nach seiner menschheit gegenwertig gehalten wird /

B

wie las

wie lassen in dann die vberal dē Herren bleiben/die in nicht vber
al/sonder allein da er wil/für gegenwertig halten? Endlich/vort
wannen kompt diese wesentliche gegenwert in des Herren Abēd
male Kompt sie auß der persönlichen vereinigung/wie die Bren
nischen wollen/wie komē sie dann auff das sitzen zur rechten Got
tes? Wirtlich vngereimter weiß/es sey dan/das sie mit den Bren
nischen/auß dem sitzen zur rechten Gottes/vnd der Menschwer
dung Christi/ein ding wollen machen. Wollen sie aber dieselbe
schliessen auß dem sitzen zur rechten/darauff sie dann dringen/so
dürffen sie entweder der wort der einsetzung nit/Diſ ist mein leib/
Diſ ist mein blut/dieweil das sitzen zur rechten hierzu genug we
re/Oder/müssen zwen gründ dieser gegenwertigkeit legen/einē/
das sitzen zur rechten/welcher mache/das der leib Christi wesent
lich gegenwertig sein könne/vnd den andern/die wort der einse
zung/welche doch on zweiffel nicht machen oder vrsach sein/das
er gegenwertig sein könne/oder wolle/oder auch gegenwertig sey/
sonder allein bezeugen würden / das er gegenwertig sein wolle/
vnd gegenwertig sey. Vnd so viel sey gesagt vom ersten teil des
anlag.

Zum andern/werffen sie vns für/das wir Christum nicht
halten für warhafft in seiner verheissung vnd in seinem Testa
ment. Diſ were ein abschewliche mishandlung/wann im also
were. Wann aber beschuldigung die sachen außmachete/wer
kündt vnschuldig bleiben? So frage ich sie nun/ob sie nicht bekē
nen/das alle so die seligkeit erlāgen/der warheit der verheissung
vnd des Testaments Christi theilhaftig müssen werden. Dann
wo diesem nicht also were/müste etwa ein weg zur seligkeit sein
außerhalb der verheissung vnd des Bundts Gottes/welches
aber vnmöglich ist. Derhalben müssen sie bekennen/so dem men
schen Christo die warheit seiner verheissung vñ Testaments/als
le die

hens, hof,

le die jenigen absprechen/die dessen leibliche gegenwertigkeit vnd
 niessung verneinen/das eben sie selbst solcher missethat schuldig
 sein/als die allein im Nachemal des Herren/auff solche gegen-
 wert dringen/so sie doch bekennen/das die glaubigē vnd getauff-
 ten/auch ehe dann sie zum Abendmal komē/ der seligkeit theil-
 hafftig sind/vnd derhalben die verheissung des Bundes inen ge-
 halten werde/Oder/so dem nicht also ist/so lassen sie vns mit vn-
 billicher aufflag solcher gotslesterung/vnbeschwert.

Derhalben weil sie hierinnen zu weit geschritten/ das wir
 durch verneinung der allenthalbenheit des leibs Christi/ solten
 die verheissung vnd das Testament Christi zu nicht machen/ so
 ziehen sie etwas zurück/ vnd geben vns zum dritten schuld/ das
 wir dennoch die warheit der verheissung Christi in seinem Abēd-
 mal verleugnen: Da schreien sie erst vberlaut/ das wir verleug-
 nen die gegenwertigkeit mit sampt der gemeinschafft des waren
 vnd wesentlichen leibs des Herren. Gleich als wir Christo einen
 andern leib/dann der für vns gegeben ist/vnd ein ander blut/dan
 das für vns vergossen ist/andichteten/vnd auß seinem einigen
 leib/zwen oder drey leibe machetē/ oder/ als hetten wir vns nicht
 nun so viel jar darüber müde geschrieben vnd geschrien/ das die
 Sacrament in zweien stücken stehen/ deren das eine jrdisch ist/
 als/das sichtbare brot vñ wein/das andere himlisch/als/der wa-
 re leib vnd das ware blut des Herren. Dann/wann haben wir
 doch je also geschwernet/das wir etwas für ein Sacramēt hiel-
 ten/damit keine geistliche gabe bedeutet würde? Wer wer hat je
 vnder vns/ da Christus seinen leib vnd sein blut nennet/ anders
 dann seinen waren leib vnd blut verständen/ob wir wol leren/das
 die eusserlichen marzeichen Sacramēts weise/ derselbe ware leib
 vnd blut Christi genennet werden? Ir leugnet aber dennoch/spre-
 chen sie/des waren leibs vnd bluts gegenwertigkeit. Zwar/ so sie

W ij das als

dz allein für gegewertig haltē / das eben an dē ort ist / da dz Abend-
 mal gehalten vñ empfangē wird / so haben wir verworffen vñ ver-
 werffen noch ganz vñ gar solche gegenwertigkeit des leibs vñnd
 bluts Christi / als ein gedicht welches den Artickeln des glaubē /
 dem bekentniß der rechtglaubigen Kirchen / der waren himmel-
 fart des fleisches Christi / Israels zuwider ist / auch mit der mitteil-
 lung oder gemeinschaft Christi / vñnd welcher willen dieses ge-
 heimniß ist eingesezt / sich keines wegs nicht reimet. So sie aber
 durch diese gegenwertigkeit verstehen / nicht daß der leib Christi
 an einem gewissen ort in oder bey dem brot sey / sonder daß er ge-
 fasset vñnd ergriffen werde durch den glauben / welcher durch
 hülff der verheissung so durchs wort geschicht / vñnd der oberreich-
 ten warzeichen / biß in den himmel dringet / vñnd alda den Son-
 Gottes ansihet vñnd fasset / So verneinen wir in diesem verstand
 keines wegs die gegenwertigkeit des fleisches Christi / sonder hal-
 ten dargegen viel mehr / diese warzeichen für gewisse pfand der-
 selben gegenwertigkeit vñnd mitteilung. Verleugnen derhalben
 nicht die gegenwertigkeit des leibs Christi / sonder bekennen ein-
 solche gegenwertigkeit / welche mit den artickeln des glaubens /
 vñ mit der einsetzung der Sacrament oberein stimmt. Vñnd wann
 man fragt / wo solchs in Gottes wort geschrieben stehe / so haben
 wir zwar kein außdrucklichers / vñnd darauß wir lieber vns lassen /
 dan eben die einsetzung des Abēdmals / Das (nēlich / das brot) ist
 mein leib / Dieser Kelch ist mein blut. Darauß wollen sie erzwin-
 gen / daß der leib vñnd das blut des Herren wesentlich gegenwer-
 tig / das ist / eben an demselben ort sein / an welchem dieses brot vñnd
 dieser wein ist. Auß welchem grund aber stehet solche ihre folge
 Dan es ist derselben ganz zuwider die warheit des leibs Christi /
 die histori seiner himmelfart / vñnd der glaube / wie Vigilius sagt /
 den alle Christliche gemeinen allezeit gehabt vñnd bekandt haben /
 daß nema

Das nemlich/das fleisch Christi/gleich wie es nit im himmel war/
 da es auff erden war/also jezund nicht auff erden sey/ dieweiles
 im himmel ist/von dannen wir auch desselben zukünfftig gewer-
 tig sind. Vnd wann diesem nicht also were/warumb het dan der
 Apostel gesagt/das wir jezund von dem Herren abwesend sind/
 welches alles dennoch die geistliche gegenwertigkeit des leibs
 Christi keines wegs nit außschleust. Will man aber sehen auff dz
 ziel/dahin die einsatzung der Sacrament gerichtet/so bit ich m̄
 wolle doch bedencken/ob sie darzu seind eingefest/das Christi vñ
 unsere leibe leiblich in oder an einander gesetzt werden/oder nicht
 viel mehr/das die glaubigen mit Christo irem haupt/vnd vnder
 einander/zu einem geistlichen leib werden. Was sol dann zu sol-
 cher geistlichen vereinigung/diese wesentliche/leibliche gegen-
 wertigkeit/welche das haupt vñnd die glider an einen ort zusam-
 men vñnd ineinander setze. Aber diese ding können mit so wenig
 worten nicht volckömlich außgefuret werde/welche ich doch hab
 kürzlich wollen anrühren/auff das unsere meinüg vnd lehr/auch
 das jenige darüber noch die spaltung ist/nicht aus vnsers gegen-
 teils vngeschicktem vnd beifsigem schelten/sonder auß vnsern ei-
 gen worten meniglich erlernen vnd vernemen möge. Was wei-
 ter zuhalten ist von der gemeinschafft des leibs Christi/ist auß de-
 so obgesagt/leichtlich zuverstehen. Dann wie der leib Christi ge-
 gegenwertig ist/also wird er auch empfangen vñnd genossen/war-
 lich nicht in gedankens oder gedichts weise/oder orte krafft vñnd
 wircküg/sonder außs aller warhafftigste vñ krefftigste/ob gleich
 solche messung mit dem hertzen vnd waren glauben geschicht/es
 sey dann/das vnser gegenteil das jenige so der glaub fasset/vñnd
 seine krafft/für nichts/vnd für ein vergeblich gedichte halte. Der
 halben sey fern von vns/das wir solten verneinen / das vns der
 ware leib vñnd das ware blut/oder Christus selbst / gegeben vñnd

mit geteilet werde (dann wie köndten sonst die wort des Apostels
 war sein/das das brot vnnnd der wein die gemeinschaft des leibs
 vnd bluts des Herren seien?) Doch also/das wir in mit dem ge-
 müt/nicht mit dem leib/das ist/mit warem glauben/nit mit dem
 leiblichen mund/nicht auff leibliche/sonder auff geistliche weis/
 nicht zur speiß des leibs/sonder zum ewigen leben sollen niessen/
 nit/sage ich/das sein leib in vnsern leib köme oder gemischet wer-
 de/sonder das aus Christo vnserm haupt/wir als seine ware/a-
 ber doch geistliche glieder/alles schöpffen/was zum ewigen leben
 der seelen vnd des leibs/welcher wirdt wider aufferstehen/ gehö-
 rig ist. Weil aber diese alle geistliche ding sind/was soll vns denn
 jene wesentliche vnd leibliche gegenwertigkeit? Was sol vns die
 niessung/die mit leiblicher hand vnd mund geschehe? Vnd eben
 auß diesem / Durchleuchtigster Churf. bitte ich vnderthänigst
 vmb Gottes vnd vnsern Herren Jesu Christi willen/dieweil vn-
 ser widersächer one auffhören schreie/das wir die göttliche krafft
 Christi nach seinem fleisch anfechten/(auß diesem sag e ich) wöl-
 len doch E. Churf. G. erachten/ob wir oder jene/dem verklärte/
 vnd/welches wir mit nichten verleugnen/zur rechten des Vat-
 ters erhabenen fleisch Christi/mehr zuschreiben. Jene vberreden
 sich selbst/das wir des fleisches Christi nicht warhafftiglich kön-
 nen theilhaftig werden/es sey dann wesentlich eben an demselbē
 ort gegenwertig/ an welchem die sichtbaren warzeichē gereichet
 werden: Dañ warumb wolten sie sonst auff diese leibliche gegen-
 wertigkeit vnd mündliche niessung/als auff ein so hoch notwen-
 diges ding also hefftig dringens? Dargegen aber bekennē wir/ wie
 solches die ware menscheit Christi erfordert/ vnd die ganze Eua-
 gelische Histori bezeuget/das das fleisch Christi/ ob es wol zum
 höchsten vber alle Creaturen verkläret vnd herrlich gemacht ist/
 doch sekund im himmel/vnd nirgend anderßwo sey vnnnd bleibe/
 vnnnd

vnd glauben dennoch/das vns/die wir auff erden seind / dasselbe
 fleisch warhafftig vnd krefftig/geistlicher weis vñ durch dē glau-
 ben/mitgeteilet werde. Zu welchem gehöret nun ein grössere vnd
 göttlichere krafft? Zu diesem das Christus/ob gleich er im him-
 mel/vnd wir auff erden sind/denoch vns / die wir so weit von jm
 sind/sich nach seinem fleisch mittheilet/vereiniget vñ einleibet/
 nicht das das wesen seines vnd vnseres leibs / leiblich in einander
 verfügt werde/sonder das er das ewig leben in vns wircke/welche
 vereinigung Christi mit seiner Kirchen/der Apostel wol vñ recht
 ein groß geheimnis hat genennet? Oder zu diesem/das er/so er
 sich mit vns vereinigen will/erst mit seinem leib zu vns sich na-
 hen/vnd denselben in unsere hende vnd mund müsse schiebē? Ich
 achte/man könne hieraus gnugsam sehen/welcher teil von dem
 menschen Christo/auch nach seinem fleisch/vñ als dann/von
 dem H. Abendmal des Herren/herlicher vñ höher halte vñ rede.

Demnach aber nun diesem also ist / Durchleuchtigster
 Ehurf. vnd Herr / mit was fug vnd recht werden wir dann als
 Kezer / vnchristen / gottstlechterer / Sacramentschender / ärger
 den Juden vnd Türcken/ von vnserm gegentheil ohne vnterlass/
 mit schreiben vnd schreyen geschmähet? Wann werden ein mal
 die verhassten namen der Zwinglianer vnd Calvinisten ein ende
 nemen? Wie lang sol des Herrn werck durch solches gezenck ver-
 hindert werden? Wie lang sollen unsere gemeine feinde von we-
 gen solcher trennungen vnser in die faust lachen? Haben dann
 diese leute mehr oder gewissere kennzeichen der Christlichen Kir-
 chen an ihnen/dann wir haben? Ist bey ihnen die gedechtnis ires
 Preceptors/Herrn Philippi Melanchthonis seligen / also were
 gehalten / als wir von herzen wünschten/vnd sie/wann es ihnen
 gelegen ist / bey den leuten fürgeben / warumb beflissen sie sich
 dann mit seiner bescheidenheit in reden vnd in schreiben nachzu-
 folgen?

P.M.

folgen? Haben auch wir uns je auff Zwinglij/ oder Caluini/ oder irgend eines menschen ansehen beruffen? Pflegen wir auch unsere von uns gestelte Confessionen/ vnd nit vil mehr das einige wort Gottes/ daraus unsere lehr genommen ist/ anzuziehen? Ja auch (bit E. Churf. G. wollen mir solches/ so ich one einigs nachtheil aller ehrlichen leut vnuerholen sage/ gnedigst zu gut halten) wo seind in vnsern gemeinen solche spaltungen/ rotten vnd gezeneß vber irgend einem stück der lere / wie vnter den Kirchendienern in Teutschen landen / die nu leider allzu lang vnd hefftig miteinander kriegen?

Wolte aber Gott/ daß E. Churf. G. sampt andern Chur vnd Fürsten/ mit irem ansehen bey gemeiner Kirchen Teutscher Nation/ so vil/ wie billich/ vermöchten/ daß fromme vnd friedsame leut gehandhabt/ vnd die andern also im zaum gehalten würden/ daß sie sich auch liessen weisen. Dann gleich wie sich gebürt/ daß Fürsten vnd Herren den Son Gottes küssen vnd ehren/ wann er durch seine knechte / ob die gleich gering vnd verachtet sind / mit ihnen redet / Also wil auch herwiderumb ein ernstlich einsehender Oberkeiten / am allermeisten gegen denen von nöthen sein/ die sich des ansehens ihres Kirchendienstes also mißbrauchen / daß sie meinen/ sie mögen reden vnd schreiben alles was sie gelüftet. Dann es gehet auch bey diesen leuten gemeinlich also zu/ daß/ je vngelehrter vnd vngeschickter einer ist / je mehr er sich bey solcher gestattung des mutwillens darff vermessen. Wolte Gott/ der exempel weren nicht so vil für augen. Aber es wil mir nicht geziemen/ daß ich hieuon weitläufftiger sage / als dem solches vom gegentheil villeicht am allermeist schuld gegeben wird. Wil derhalben von diesem nicht weiter meldung thun / sonder von meiner person etwas sagen.

Nach dem ich durch etlicher leut vngegründete vnd sehr beschwerz

Siehe das
wie der
was vns
sagt

beschwerliche Schrifften zu diesem streit genötiget bin worden /
 hatt ich mir zum theil aus eignem gutdüncken / zum theil aus er-
 manung Fürstlicher Durchleuchtigkeit zu Hessen / fürgenom-
 men ganz vnd gar zuschweigen / wiewol ich mit mancherley
 schmähungen von vielen angetastet war / Endlich hat sich dieser
 jämmerliche streit / welcher Gott gebe / daß er der letzte sey / zwi-
 schen der Schul zu Witteberg vnd eintheils Predicanten inn
 Sachsen / erhaben / welchen als ich aus dem gemeinen geschrey /
 vnd auch aus etlicher giftigen Schrifften vernommen hatt /
 was solt ich anders thun / denn stillschweigend seuffsen / vnd den
 zorn Gottes abbitten ? In dem ich aber solches / wie Gott mein
 zeuge ist / mit allem ernst gethan / hat sich D. Selnecker / einer /
 wie ich höre / nicht von den geringsten friedsfeinden / herfür ge-
 than mit vnterschreibung der zu Jhena. Dieser als er seins be-
 dänckens / eine grosse heimliche gefahr hinder der sachen stecken
 sahe / oder villeicht / weil er vermeinte / er hette daheim nit streits
 gnug / damit er ihm einen namen machte / hat auch mich mit na-
 men angegriffen / als hette ich ein falsche vnd vnchristliche auß-
 legung der Schrifft eingefürt / zu welchem er auch jesund noch
 ein neue klage wider mich gefürt / daß ich in Sachsen von mir
 außgeschickte vnd bestelte leut sol haben / vneinigkeits zumachen
 vnd zumehren. Nie wuste ich abermal anders nicht zuthun / dan
 daß ich solche mir gegebne schuld der vnchristlichen verfelschung
 der Schrifft / von mir ableinete. Hab derwegen als ein genötig-
 ter / auffss kürzeste vnd lindeste / als die sache wolte leiden / ge-
 antwortet. Auff diese meine antwort hat gemelter D. Selne-
 cker eine sehr giftige vnd bittere verantwortung lassen außge-
 hen / vnd E. Churf. S. zugeschrieben. Derhalben hab ich dar-
 auff meine andere antwort gethan / ganz vnd gar nicht dieser
 meinung / daß ich den habere erlengern wolte (dann ich diesen leu-
 E ten / so

Selnecker er
 Friede fern

ten/so sie nicht auffhören/ forthin lieber mit schweigen dann mit
 schreiben begegnen wil) sonder das man dennoch sehen möchte/
 wie frech vnd vnuerschempt diese art sey/ die leut vnbillicher wei-
 se zu verleumbden/ vnd wie bloß sie stehen wann es zum beweiß
 kompt. Dieweil dann E. Churf. G. den kläger gehöret/ so bin
 ich tröstlicher zuversicht/ sie werden auch diese meine verant-
 wortung gnedigst vernemen. Dann das alte recht zu Athen/das
 man beyde theil vnparteiisch hören sol/ ist ohne zweiffel aus der
 natürlichen billigkeit her geflossen. Dis ist an E. Churf. G.
 mein demütigste bit. Viel mehr bit ich aber Gott den allmechti-
 gen/ tag vnd nacht/ das er allen Chur vnd Fürsten in Teutschen
 landen/ fürnemlich aber E. Churf. G. diesen sinn vnd gemüt
 gebe/ das sie den fried vnd einigkeit der Kirchen/ für allen dingen
 vnd geschafften ihnen lassen angelegen sein/ vnd er ihnen solche
 mittel an die hand gebe/ welche alle/ so Gottes ehr vnd gemeinen
 Fried lieben/ der gansen Christenheit nutz vnd notwendig erkenn-
 en/ es sey gleich das durch beyder theile verhörung / oder durch
 etlicher vngestümmer leut stillung / oder einstellung beyder seits
 bisher geschenehen antastungen / die sache hingelegt möge wer-
 den. Vnd zwar zu solchem fried zukommen/ mag nicht wenig
 dienen/ der newlich aus E. Churf. G. verordnung/ zu Dresden
 auffgerichtete Consens/ wiewol schon allbereit ihr mehr dann zu
 vil sind / die eben aus demselben newe gezänck zuerregen vrsach
 suchen. Dann was von der person vnd menschwerdung Christi/
 von seiner Himmelfart / von seinem sitzen zur rechten des Vate-
 ters/ vnd von seiner herrligkeit vnd Maiestet/ durch gottselige
 vnd gelehrte männer/ in derselben versamlung Schriftlich ver-
 fasset / ich gelesen habe / das alles ist der warheit gemess / Christe-
 lich / rechtglaubig / vnd mit der von vns allzeit gefürter lehre
 durchaus einhellig / also das meines achtens keiner ein Christ zu
 nennen

tel
 fri

i
 ii
 iii

sonst
 es ist

In da In
 der vorse
 steht wohl.

mennen ist / der solche lehre nicht annimpt / vnd mich nicht wenig
 wundert / daß D. Selnecker gegen E. Churf. G. so vil wort ge-
 macht / von denen articeln / so gar nicht streitig sind / es sey dann
 daß er velleicht mit E. Churf. G. Theologen hierinnen auch
 nicht einig ist. So vil aber auch des Herren Abentmal an-
 langend / ist dauon beßgleichen den mehrentheil wol vnd deutlich
 geredt. Von dem vbrigen aber / so gelehrte vnd mit gottseligem
 einer vnd sanffemütigem geist begabte Männer / sonderlich aus
 verordnung vnd befehl Höchst vnd Hochlöblicher Chur vnd
 Fürsten / vnterredung hielten / köndte man meines achtens /
 leichtlich zu Christlicher einigkeit kommen. Zu einer solchen ver-
 samlung vnd handlung zudienen / solte mich auch keine gefahr
 meines lebens / wil geschweigen irgend eine mühe vnd beschwer-
 nis abschreckē. Aber hievon gnug. Unser Herr Jesus Christus /
 der ware vnd ewige Gott aller barmhertzigkeit vnd des friedes /
 wolle E. Churf. G. mit seinem großmütigen Fürstlichen Geist /
 je lenger je mehr stercken / vnd mit seiner krafft aus der Höhe ge-
 waltiglich vnd glückseliglich / biß auff jenen letzten tag erhalten.
 Gegeben zu Genff / den 18. Februarij / im jar der letzten zeit /
 1572.

E. Churf. G.

Vnterthänigster

Theodorus Beza diener der
 Kirchen zu Genff.

Ziv Wv sam
 liny der Ge
 lert vnter
 den Fürst
 Er erbiet

Jg 1825 (5/6)

ULB Halle 3
003 710 432



Sb₁

LD 77 1





34

Sendbrieff

JHEDDORZ BEZAE

An Churfürstliche Durchleuchtigkeit zu Sachsen/
die Spaltung von der Majestet vnd
dem Abendmal vnseris Herren
Jesu Christi belangende:

Dem Teutschen/Christlichen/friedliebenden
leser zu gut/vnd zur ableinung vnd linderung
der vnbillichen schmähungen vnd verbitterungen/so sich
bisher vber diesen Artickeln Christlicher lesere
haben zugetragen/aus dem Latein verteutschet.

Galat. 5.

So jr euch vndereinander beisset vnd fresset/so sehet zu/
daß jr nicht vndereinander verzeret werdet.

Gedruckt in der Churfürstlichen Statt
Heidelberg durch Johannem Meier.

